



欽定四庫全書

子部
儒家類存目三

子部
20
130
52

12
130
52

五十二



1380
52

學東

欽定四庫全書總目卷九十五

子部五

儒家類存目一

孔子家語註八卷 湖南巡撫採進本

明何孟春撰孟春有何文簡疏議已著錄古本家語久佚今本家語擬自王肅其註亦肅所作名注古書實自注也故其本於諸家為善然明代罕傳至崇禎末毛晉始得北宋本刻之故崇禎以前明人無見舊本者孟春以元王廣謀家語註庸陋

所錄
有物

子部 儒家類存目一

荒昧又正文多所漏略乃為此註其考訂補綴不為無功而由未見王肅註故臆測亦所不免其序謂今本不同於唐未必非廣謀之妄庸有所刪除其論近理而近時重刊孟春註者因顏師古註漢書藝文志家語二十七卷條下有非今所有家語之文遂謂唐以前本業已不同烏知孟春所據非古本案師古但云唐時家語非古家語不云其時別有古家語也隋志孔子家語二十一卷王肅註梁有當家語二卷魏博士張融撰亡舊唐書經籍

志孔子家語十卷王肅註新唐書藝文志亦同孟春安得古家語此假借之詞非篤論也至近本所校補孟春闕誤凡數百條皆引據精確則孟春是註之舛漏抑可知矣

家語正義十卷

江蘇巡撫探進本

國朝姜兆錫撰兆錫有周易本義述蘊已著錄是書首列至聖年表正論其四十四篇之次則從葛簡本以正論與三問禮篇為卷九以本姓終記與七十二弟子篇為卷十案明毛晉汲古閣本自跋謂

初從吳興賈人得一編乃北宋版王肅註本惜二卷十六葉以前皆蠹繼從錫山酒家得一函亦宋刻王氏注也所逸者僅末二卷因急倩能書者一補其首一補其尾二冊儼然雙壁縱未必夫子舊堂壁中故物已不失王肅本註矣是汲古閣刊本其篇目次第胥仍王本之舊卽徐燊家宋本家語亦僅與毛本小異不云卷目有所易置也兆錫乃從葛籛之本竄亂舊次殊爲勇於變古其訓釋亦似俗下講章之體不足以資考

證

孔叢子正義五卷

江蘇巡撫探進本

國朝姜兆錫撰是編卽世傳孔叢子刪去連叢子上下篇又刪去小爾雅詰墨二篇但以記孔氏言行者編爲五卷每條之下略仿詩序之例註曰此言某義也謂之正義其中偶有考訂者如納于大麓作大錄萬機之政此自舊說而引蔡沈傳以駁之其他凡引經與宋儒傳註不合者悉謂之斷章未免拘墟之見至於子順說趙王以歸齊尸助嫪毐

以存魏國兆錫亦頗疑之然往往回護其詞不肖
竟斥為依託也

曾子全書三卷

江蘇周厚培家藏本

明曾承業編承業為曾子六十二代孫序稱博士
蓋襲職之宗子也案宋汪暉嘗輯曾子一卷分十
二篇割裂補綴已非唐以來之舊本是編又分十
言一篇為卷一修身事父母制言上中下疾病天
圓七篇為卷二本孝立孝大孝三篇為卷三與王
應麟玉海所云今十篇自修身至天圓皆見於大

戴禮者又多出主言一篇而分合迥異不知其何
所依據殆亦以意為之也

忠經一卷

江蘇巡撫採進本

舊本題漢馬融撰鄭元註其文擬孝經為十八章
經與註如出一手考融所述作具載後漢書本傳
元所訓釋載於鄭志目錄尤詳孝經註依託於元
劉知幾尚設十二驗以辨之其文具載唐會要烏
有所謂忠經註哉隋志唐志皆不著錄崇文總目
始列其名其為宋代偽書殆無疑義玉海引宋兩

朝志載有海鵬忠經然則此書本有撰人原非贗造後人詐題馬鄭掩其本名轉使真本變偽耳

女孝經一卷

內府藏本

唐鄭氏撰鄭氏朝散郎侯莫陳邈之妻侯莫陳三字複姓也前載進書表稱姪女策爲永王妃因作此以戒唐書藝文志不載宋史藝文志始載之宣和畫譜載孟昶時有石恪畫女孝經像八則五代時乃盛行於世也其書仿孝經分十八章章首皆假班大家以立言進表所謂不敢自尊因以班大

家爲主其文甚明陳振孫書錄解題直以爲班昭所撰誤之甚矣

千秋金鑑錄一卷

江蘇周厚培家藏本

舊本題唐張九齡撰案王士禎皇華紀聞曰隆慶閒曲江刻張文獻千秋金鑑錄一卷又僞撰序表平湖陸世楷爲南雄守著論辨之此等謬僞凡略識之無者亦不肖爲而粵中新刻曲江文集竟收入故孝山謂急應火其書碎其版云云今此書序中所謂非吾子孫不得記錄非人而傳必遭刑憲

學則素衣之人爲上達不學則赭衣之人爲白士
此錄一千年後方許流布諸語皆與世楷所指駁
者合士禎又言別有金鑑錄一冊乃嘉靖閒文獻
裔孫張希祖所撰康熙甲辰曲江令凌作聖重刊
士禎所摘謬妄不經之處如安祿山爲野猪之精
史思明爲翻鳥之精楊貴妃爲白鷗之精又立子
旦爲相王武后太子先爲中宗皇后廢之又名哲
宗又蜀州司戶楊元琰女爲上子壽王妃今上寵
之賜名楊貴妃又宮室未委肅宗也諸語今亦皆

在錄中則兩本亦大概略同也末一章預作讖語
言及狄青諸人尤爲妖妄蓋粗識字義而不通文
理者所爲本不足存以其出於九齡之子孫惑惑
流俗故存而闢之俾無熒眾聽焉

漁樵對問一卷

兩江總督
採進本

舊本題宋邵子撰晁公武讀書志又作張子劉安
上集中亦載之三人時代相接未詳孰是也其書
設爲問答以發明義理所稱有溫泉而無寒火者
楊慎丹鉛錄嘗引葛洪抱朴子蕭邱寒焰以駁之

不知儒者論理論其常耳其偶異者即使有之不足為據執松柏而謂冬不肅殺執靡草而謂夏不茂育則拘墟之見也且蕭邱誰得而見之葛洪又何自而知之撫百家迂怪之言以曲相詰難則道經釋典理外之事亦多矣可援以為證乎至天何依曰依乎地地何附曰附乎天天地何依何附曰自相依附一條慎亦駁之然地處天中大氣包而舉之所以不墜卵黃脬豆厥譬甚明是即依附之明證慎不知歷術所以獻疑均不足為是書病然

書中所論大抵習見之談或後人撫其緒論為之如二程遺書不盡出於口授歟

太極圖分解一卷

浙江范懋柱家天一閣藏本

不著撰人名氏天一閣書目作羅鶴撰然書中自稱鶡曰則名鶡非名鶴矣考江西通志羅鶡字黃人嘉靖辛酉舉人官至思南府同知當即其人范氏誤以鶡為鶴也案嘉靖中別有羅鶴泰和人所著有應菴任意錄詳雜家類中本條其書列周子太極圖說與朱子之註而申陸九淵之說以駁之案聖人立教使天下知所持循

而已未有辨也孟子始辨性善亦闡明四端而已未爭諸性以前也至宋儒因性而言理氣因理氣而言天因天而言及天之先輾轉相推而太極無極之辨生焉朱陸之說既已連篇累牘衍朱陸之說者又復充棟汗牛夫性善性惡關乎民彝天理此不得不辨者也若夫言太極不言無極於陽變陰合之妙修吉悖凶之理未有害也言太極兼言無極於陽變陰合之妙修吉悖凶之理亦未有害也顧舍人事而爭天又舍共睹共聞之天而爭耳

目不及之天其所爭者毫無與人事之得失而曰吾以衛道學問之醇疵心術人品之邪正天下國家之治亂果繫於此二字乎醫家之論三焦也或曰有名而無形或曰上焦如霧中焦如漚下焦如瀆實有名而有形軀軻喧闐動盈卷帙及問其虛實之診則有形與無形一也問其補瀉之方則有形與無形亦一也然則非爭病之生死特爭說之勝負耳太極無極之辨適類於是故今於兩家之說率置不錄謹發其例於此後不縷辨焉

太極圖說論十四卷

浙江吳玉
壚家藏本

國朝王嗣槐撰嗣槐字仲昭錢塘人康熙己未薦舉
博學鴻詞老不與試授內閣中書舍人以歸其書
論聖人言易有太極未嘗言無不應於太極之上
復加無極二字疑此圖授自陳搏非周濂溪作朱
陸互相辨析朱子不得已止作無形有理以解之
而無極二字總流入二氏之說又謂其言天道則
曰動而生陽靜而生陰乃老氏道生天地之說言
人道則曰聖人定之以仁義中正而主靜主靜二

字尤為老氏根本所在又謂其原始反終故知生
死二語乃老氏言道之根原而不死無生之樞紐
逐條辨駁各為一篇亦力申陸九淵之說者也

太極圖說集註卷

山西巡撫
採進本

國朝孫子昶撰子昶號主一聞喜人康熙己未進士
官垣曲縣知縣是書取朱子之解分配周子之圖
列為十章分裂原圖各繫於下又解周子原說亦
分為十章而句解字釋所釋各註右解之幾章釋
某義全摹朱子大學章句之體圖之後附以子昶

所演易圖說之後附以諸家之說大抵皆可已而
不已前有康熙丁卯范鎬序亦頗著微詞云

太極圖說註解

無卷數 浙江巡撫採進本

國朝陳兆成撰兆成字慎亭常熟人是書作於康熙
初以發明朱子太極圖說之註其云性雖夾和在
氣稟中而苟無習染之累亦第於善之中微分差
別若謂之有惡則不可足以補正程子善固性也
惡亦不可謂之非性之說惟其談五行干支語多
軼轡至於以一歲四時每一時九十日分為十八

日者五以五行各分主十八日尤為新異未有乾
隆戊辰其子魯附記凡例稱是書與參同契互有
異同是刻可分為二可合為一云云蓋與所註參
同契竝刊者宜其惟講陰陽五行之說矣

通書問一卷

江西巡撫採進本

元何中撰中有通鑑綱目測海已著錄是書因朱
子謂周子通書乃發明太極圖說之義故所註通
書皆比附於太極陰陽五行中則謂二書各自為
義不必字字牽合故作此書以辨之前有自序謂

自天地以來止有一理理之同者雖百世之上百世之下九州之內四荒之外無不同也而況一人之心一人之言豈有不相通者乎朱子釋通書顯微闡幽有功於學者至矣然必欲以通書發明圖說則恐非周子著書之本意云云其持論頗精核所疑各條亦皆中理卷末附記稱竊窺朱子之意同時學者固有疑圖說非周子之書而朱子主張甚力遂以圖說為主而以通書為發明圖說而作云云尤深得當時有激而立言之故然二書分而

解之固各有義理合而解之於本意亦無所害既非宏旨所關又何必字句之間徒滋聚訟耶

太極釋義一卷通書釋義一卷

兩江總督採進本

明舒芬撰芬有周易箋已著錄此其所著梓溪內集之二種也其說太極大抵以太極圖不本於易而本於河圖謂秋冬非肅殺乃百物之所胎土之寄王維夏秋之交火烈金剛水緩土柔性之所以相近火散金遁木上水下習之所以相遠皆與先儒之說不同亦往往有難通之處通書則不過隨

文解義而已其釋顏子章謂陋巷陋俗之巷也其人習不善而能憂顏子之貧乃顏子之德所化其說亦殊怪異也

正蒙釋四卷

浙江巡撫探進本

舊本題明高攀龍集註徐必達發明攀龍有周易簡說必達有南京都察院志均已著錄葉向高序稱正蒙精深浩渺朱子訓釋未盡錫山高雲從緣其指廣為集註橋李徐德夫篤好此書嘗條其所見謂之發明以質雲從之說同者去之異者存

之異而此失彼得者去之短長互見者存之云云則此書為必達所自定非攀龍之本矣

周張全書二十二卷

內府藏本

明徐必達編周子書自太極圖說通書而外僅得詩文尺牘數首附以年譜傳誌及諸儒之論為七卷張子書正蒙理窟易說而外兼載語錄文集其散見於性理近思錄二程書者蒐輯薈粹別為拾遺附錄通十五卷

太極解拾遺一卷通書解拾遺一卷後錄一卷西銘解

拾遺一卷後錄一卷

湖南巡撫
採進本

國朝李文炤撰文炤有周易本義拾遺已著錄是書以太極圖說通書西銘朱子祇解其大義因於原註下別加案語發揮其說故名曰拾遺

正蒙集解九卷

湖南巡撫
採進本

國朝李文炤撰是編解張子正蒙粗具訓釋無所發明其乾稱篇以朱子取西銘自為一書故刪除不載此與陳澧註禮記刪除大學中庸亦何異乎至其解參兩篇七政交食之理皆據黃瑞節舊文九

為疏略

周子疏解四卷

陝西巡撫
採進本

國朝王明弼撰明弼有易象已著錄是書成於康熙癸巳凡解太極圖說一卷解通書三卷皆列朱子之註於前而以己意敷衍之大意取便初學而已

濂關三書

無卷數
直隸
總督採進本

國朝王植撰植有四書參註已著錄是書取太極圖說通書西銘三書以朱子之註列於前採諸家之說附於後亦時時參以己意植於宋五子書皆有

註然皇極經世正蒙其書註者差稀故頗有所考
訂此三書則人人熟讀無可發揮亦如宋以來註
孝經者隨文演義而已

伊川粹言二卷

江蘇巡撫
探進本

舊本題宋張栻編考宋濂潛溪集有此書跋謂前
序不著姓氏相傳為張南軒栻撰則明初此書尚
不著栻之名此本當為後人據濂語補題也其序
題乾道丙戌正月十有八日然栻南軒集但載二
程遺書跋而無此序使果栻作不應諱而削之也

蓋併編次之說皆在影響之間矣

二程節錄四卷文集鈔一卷附錄一卷

江蘇巡撫
探進本

明高攀龍編取二程語錄擇其精粹先辨性次論
學次治事次釋經每類各為一卷末載文集鈔及
附錄各一卷前有康熙癸未陸桴序稱攀龍官行
人時為是書其手鈔本藏同邑秦松齡家顧整欲
刻之未果整子棟高乃踵其父志刊行云

程子詳本二十卷

浙江朱彝尊家
曝書亭藏本

明陳龍正編龍正有救荒策會已著錄龍正以二

程遺書雖朱子所手編而其記載之重複字句之同異以至議論之出入均未暇是正乃排比刊削分類編次定爲此本其經說之別行者亦併載入又益以元譚善心之傳聞續記自序視全書頗約而實不敢不加詳故不曰約本而曰詳本其閒於二子之說多所辨駁不出明末講學家詬爭之習

二程語錄十八卷

河南巡撫探進本

國朝張伯行編伯行有道統錄已著錄初朱子輯程氏遺書二十五篇皆程子門人記其所見聞答問

之詞又取諸集錄爲程氏外書十二篇又附錄一卷爲行狀墓誌之類凡八篇是書篇目次第悉依朱子原本而稍加刪訂合爲遺書十五卷外書二卷附錄一卷其少日所聞諸師友說一卷已巳冬所聞一卷悉刪不錄外書亦刪馮氏本拾遺一卷又附錄一卷內以明道先生行狀一篇墓誌一篇門人朋友敘述序一篇皆伊川所作已入二程文集故不復載而邢恕一篇謂其自絕於程門亦不錄焉其遺書第六卷中伯行註云此一卷朱子原

分三卷今爲一卷又下二卷專說孟子者已與經說易傳另行別錄概不載集中考朱子原本卷六以下本四卷無篇名卷九本一卷專說論孟今伯行以四卷爲三卷以說論孟一卷爲二卷又第九卷兼說論孟而伯行云專說孟子殆偶然筆誤刊版者失於校讎歟

程書五十一卷

內府藏本

國朝程湛編湛爵里未詳是編所錄惟程氏遺書外書而益以明道文一卷其次序則非朱子之舊也

浩齋語錄二卷

江西巡撫採進本

舊本題宋過源撰卷末有源行實一篇稱源字道源號浩齋其先浙東人至高祖徙於臨川源生有異徵篤志聖賢之學以斯文自任嘉祐間召爲國子直講不赴卒於崇甯丙戌九月併載所著述甚富今皆不傳惟此書僅存上卷爲其門人永新龍圖所錄下卷爲其門人白城章偉所錄而其從孫昂刊之然所列書名宋史及諸家書目皆不著錄其中疑竇尤多如行實稱源生於丙子不著年號

以召於嘉祐卒於崇甯推之當生於仁宗景祐丙子則卒時年七十一召時年二十餘是於邵周張程皆爲行輩當時所稱不過曰堯夫茂叔子厚伯淳正叔而已諸家之書可考而此曰邵子周子張子程子非同時語也李壽長編凡所有徵召如胡瑗孫復常秩之類無不具書源見徵旣在嘉祐中何以嘉祐首尾八年長編皆不見其事伊川易傳據楊時跋則臨歿以橐授張繹至政和初時乃排比成書源卒於崇甯五年在伊川前其時易傳未

出何以論程傳之得失自朱子以前無以大學爲曾子作者故攻朱子者以章句爲口實此書乃已稱曾子何以自北宋以來無人引及大學中庸自二程子始表章其書於禮記中取出別行後人辨難者惟引梁武帝有中庸義疏宋仁宗嘗書大學賜進士以爲先於程子而已此書乃先有大學定本中庸定本又何以宋儒無一語及之耶觀其論樂以黃鍾爲三寸九分是呂氏春秋之文李文利不得其解衍爲異說者也萬歷以前安有是僻論

平其跋稱有秦觀謝無逸二序觀淮海集具在實無此文無逸溪堂集雖佚而詩文散見永樂大典中今已哀輯成帙亦無此文其依託可以概見又未附其從孫勗祖光賦稱宣和乙巳余在遼陽乙巳爲靖康前一年兩國兵交信使且艱於往來游學之士安能越國至是其僞尤不問而知矣

唐氏遺編四卷

江蘇巡撫採進本

宋唐棣編棣字彥思宦與人嘗受業於伊川程子與門人共記平日問答之語爲此書已載入二程

之遺書康熙中其裔孫一學等重刊於家塾乃易以遺編之名未附桐友遺編一卷則一學之父所作一學又與其弟詩及開緒各附已見綴列各條之下

通言一卷

永樂大典本

宋吳沆撰沆有易璇璣已著錄此書亦語錄之類如曰不求過於人而人不能及之者善道也不求合於人而人不能離之者善德也又曰立朝廷而後見山林之志享富貴而後見貧賤之節論亦閒

有可取然其自序有曰孟軻談仁義至楊墨而不通其道小不足以容楊墨故也孔子則無所否矣韓愈原道德至佛老而不通其道小不足以容佛老故也王通則有所可矣其宗旨殊為謬誕不可訓也

道南三先生遺書十一卷

浙江巡撫採進本

不著編輯者名氏摘錄楊時羅從彥李侗三家語錄及雜著楊氏四卷羅氏六卷李氏一卷三人皆南劍州人疑其鄉人所編也千頃堂書目載莆田

宋端儀有道南二先生遺書或卽是編歟

崇正辨三卷

兩淮馬裕家藏本

宋胡寅撰寅有讀史管見已著錄是書專為闢佛而作每條先引釋氏之說於前而辨正於後持論最正其剖析亦最明然佛之為患在於以心性微妙之詞相亂聖賢之學問故不可不辨至其經典荒誕之說支離矛盾妄謬灼然皆所謂不足與辨者必一一較其有無是亦求勝之過適以自褻矣

小學集解六卷

直隸總督採進本

欽定四庫全書總目卷九十五

子部 儒家類存目一

十五

國朝張伯行撰是編以坊刻小學數十種纂註標
題止爲試論剽竊之具無當於朱子親切指點
引人身體力行之意因集諸家註釋融會其說
以成是編伯行沒後其門人樂亭李蘭梓行
之

小學集解六卷

福建巡撫
採進本

國朝黃澄撰澄字庭聞莆田人康熙中諸生其書取
朱子小學內外篇參會舊註附以己見章分句釋
援引頗爲賅洽然亦不免於過冗

小學分節二卷

浙江巡撫
採進本

國朝高熊徵撰熊徵字渭南岑溪人順治庚子副榜
貢生官至浙江都轉鹽運使是書隨章案節略爲
分解特使童子讀之易於明曉而已

小學集解六卷

江蘇巡撫
採進本

國朝蔣永修撰永修有孝經集解已著錄是編卽其
提督湖廣學政時與孝經合刊者註釋甚略而先
賢爵里事蹟與小學無關者乃載之頗詳於朱子
著書之旨似乎倒置矣

小學纂註六卷

編修勵守謙家藏本

國朝高愈撰愈有高註周禮已著錄是書因天台陳

選舊註略刪訂之後附總論及朱子年譜

小學句讀記六卷

陝西巡撫探進本

國朝王建常撰建常有律呂圖說已著錄是書因陳

選小學註本而雜採諸書疏於其下略如孔穎達

正義之例文頗煩蕪

近思錄集解十四卷

湖南巡撫探進本

國朝李文炤撰是編取朱子之說散見各書者附於

近思錄各條之下其未備者則益以諸家之說閒

亦自附已意前有綱領數條末附感應詩解一卷

訓子詩解一卷感應詩見朱子大全集訓子詩稱

傳自黃榦而無可證據其詩淺俗決非朱子所為

也

紫陽宗旨二十四卷

兩江總督探進本

舊本題宋王佖撰佖東陽人卽淳祐王子作朱子

年譜序者也其書採輯朱子文集語類分誨人析

理明經論事四門每門又各分子目其中註語有

出朱子原文者亦有出似所增識者考趙希弁讀
書附志載晦菴先生朱文公語後錄二十卷註曰
右東陽王似記楊方黃榦劉琰黃灝邵浩劉砥李
輝黃卓汪德輔陳芝吳振吳雉林子蒙林學履劉
礪鍾震蕭佐舒高魏春楊至所錄也其說謂池錄
初成勉齋猶未免有遺恨於刊行之後況饒本又
出於其後乎此二十卷皆池饒所未及刊者云云
其書名各異卷數復殊據其所言乃續刊之語錄
體例亦與此書不合惟內閣書目有似紫陽宗旨

三十八卷千頃堂書目則作二十八卷書名撰人
均與此本相合而卷數復異未詳其故然浙江通
志經籍門中以似朱文公語後錄列爲一條而以
此書附載於下不入標目則亦疑非似作矣

朱子語類纂十三卷

山東巡撫
採進本

國朝王鉞撰鉞有粵遊日記已著錄是書其世德堂
遺書之第五種也取黎靖德所編朱子語類一百
四十卷摘理氣鬼神性理論學四門餘皆不取四
門之外又各刪存大略而閒附以已說如朱子謂

理氣本無先後語原無病鉞必謂先有天地之理
然後太極生兩儀如其所說是理又別是一物可
以生氣然則氣未生時理又安在此主理太過之
弊又如謂雨是鬱蒸之氣有時龍能爲之者龍亦
是鬱蒸之氣雹是不和之氣有時蜥蜴能爲之者
蜥蜴亦是不和之氣執一理以該天下之變不至
於穿鑿附會不止矣

朱子文語纂編十四卷

編修勵守
謙家藏本

不著編輯者名氏其書取朱子文集語類約略以

類相從而不分門目前後亦無序跋蓋草創未完
之本也

玉溪師傳錄一卷附錄一卷

兩江總督
採進本

舊本題宋童伯羽撰伯羽字蜚卿甌甯人朱子之門人
也是編所錄朱子語在語錄饒本內繫以庚戌庚戌
爲紹熙元年伯羽時年四十七也本名晦菴語錄
明成化中其九世孫訓以語類諸本參校補訂改
題今名前列道學統宗一圖上溯羲孔而以伯羽
直接朱子之下蓋亦訓之所爲後附墓表行實載

朱子詩二首及敬義堂銘考朱子文集及續刊諸集皆所未載莫詳所自其稱伯羽撰四書集成孝經衍義羣經訓解三書宋志不著錄朱彝尊經義考亦惟載伯羽有四書訓解無此諸名又前有邱濬序其文不類復有龔道後序作於萬歷甲午而稱皇宋淳熙跳行出格尤爲舛迕疑卽訓拮拾語類附益之非必果出伯羽也

分類標註朱子經濟文衡七十五卷

江蘇巡撫探進本

宋滕琪編其原本已著錄此本爲明朱吾弼重刊

卽琪之書而標其要語於簡端以備答策之用殊爲猥陋

性理字訓一卷

湖北巡撫探進本

舊本題宋程端蒙撰程若庸補輯端蒙字正思德興人淳熙七年鄉貢補太學生若庸字達原休甯人咸淳四年進士嘗充武夷書院山長端蒙所作凡三十條若庸廣之爲造化性情學力善惡成德治道六門凡百八十三條門目糾紛極爲冗雜明初朱升又增善字一條撫袁甫之說以補之共爲

一百八十四條皆以四字爲句規仿李瀚蒙求而不諧聲韻不但多棘唇吻且亦自古無此體裁疑端蒙游朱子之門未必陋至於此或村塾學究所託名也

聖門事業圖一卷

編修勵守謙家藏本

宋李元綱撰元綱字國紀錢塘人孝宗時上庠生是書凡分十圖曰傳道正統曰大本達道曰進修倫類曰爲學之序曰存心要法曰求仁捷徑曰聚散常理曰傳心密旨曰一氣通感曰帥氣良方曰

心性本體前有自序後有自跋其大旨以存心爲主以謹獨爲要而以窮理爲用力之始大抵皆儒生習見之說

庸言一卷

永樂大典本

宋楊萬里撰萬里有易傳已著錄是編乃其語錄大致規摹揚雄法言頗極修飾之力較其詩文又自爲一體而詞工意淺亦略近於雄

明倫集三卷

永樂大典本

宋塗近正撰近正字尊爵筠陽人歐陽偉跋謂其

錢氏曰屋全書卷之三
隱德弗耀以私淑諸人爲已任謝樞政則稱致政
塗公自序亦題嘉定六年承務郎致仕塗近正則
近正故嘗通籍矣是集雜採前言往行分爲十類
一曰盡事二曰養志三曰勿辱四曰移忠五曰移
治六曰因睦七曰廣孝八曰念德九曰家學十曰
揚名自序有曰考諸載籍隨事而書衣冠之族必
志其家法而不問閱閱文章之錄必志其行實而
不取浮華其論周公曰嘗讀金縢之書常棣之詩
見周公之仁兄弟而不見周公之誅管蔡後世信

以爲周公自誅管蔡者起於孔安國傳書之妄與
漢儒序詩之誤我之弗辟辟者避也言卽日以冢
宰之事付之召公畢公而身乃避居東都以待命
安國訓辟爲法遂使周公之志不白於天下其於
經亦閒有發明惟所錄多習見之事未免爲牀上
牀屋下屋耳

子家子一卷

永樂大典本

宋家頤換頤字養正眉山人其始末未詳衛湜禮
記集說嘗引其語則亦研經之士也此書趙希弁

讀書附志著錄世罕傳本此本載永樂大典中蓋
語錄之類亦頗明白醇正而率皆習語案公羊傳
有子公羊子子沈子子司馬子子女子子北宮子
何休註發例於子沈子下曰子沈子後師稱子冠
氏上者著其爲師也此書果曠自撰不應自稱子
家子殆其門人所題歟然劉禹錫集中亦自稱子
劉子或偶然沿誤亦未可知也

言子三卷

永樂大典本

宋王爚編爚字伯晦會稽人陳振孫書錄解題云

言子相傳所居在常熟縣慶元閒邑宰孫應時始
爲之祠近王爚復哀諸書爲此書梁維樞內閣書
目云宋嘉熙閒平江守王爚輯子游言行及祠廟
事蹟自序以言子生是邑嘉言懿行散在經傳爰
輯是書其本末可以考見蓋以言子吳人故爲此
編而刊之以存於祠其書分內篇外篇附錄爲三
卷所採不出論語禮記家語孔叢子諸書無異聞
也

心經附註四卷

浙江巡撫採進本

欽定四庫全書

子部 儒家類存目一

三七

明程敏政撰敏政有宋遺民錄已著錄其書以真德秀心經僅書一條詩二條易五條論語三條中庸二條大學二條樂記三條孟子十二條接以周子二條程子一條范氏一條朱子三條未為賅備又其註中或稱西山讀書記疑非德秀自作乃補輯釐為四卷名曰附註前後皆有敏政序末私印文曰伊洛淵源蓋敏政自以為程子裔云

大學衍義通略三十一卷

內府藏本

明王誨編誨號竹巖永嘉人嘉靖庚戌進士官至

右僉都御史巡撫貴州其書取楊廉大學衍義節略邱濬大學衍義補合為一編凡節略十卷補略二十一卷閒亦釋字證義取便檢閱無所闡明

大學衍義輯要六卷大學衍義補輯要十二卷

江蘇巡撫採進本

國朝陳宏謀撰宏謀字汝咨號榕門臨桂人雍正癸卯進士官至大學士諡文愨是編乃宏謀官雲南布政使時所刊取真德秀大學衍義四十三卷纂為六卷邱濬大學衍義補一百六十卷纂為十二

卷蓋爲邊方之士艱購全書者設也

研幾圖一卷

浙江巡撫
採進本

舊本題宋王柏撰柏有書疑已著錄是書前有自序稱溫習舊書有未解者因畫成圖沈潛玩索萬理悠然而輻輳云云考宋史柏本傳雖載柏嘗撰研幾圖然其本不傳元代諸儒亦未嘗一字及是書至明永樂中突出此本自二五交運以下爲圖者凡七十三又衍聖公孔昭煥家別傳一本增綴以李元綱聖門事業圖徐毅齋性命心說諸圖共

爲圖八十五大抵支離破碎徒亂視聽卽真出於柏亦無足採更無論其僞撰也

太極辨三卷

永樂大典本

元孫自強撰自強會稽人仕履未詳是書大旨謂聖人之言約而明先儒之論詳而汨又謂漢唐以來語焉而弗明濂洛諸賢明焉而未純學者因其辭之紛紜不以異端傳會於聖經者鮮矣故條舉太極圖說正蒙及朱子四書集註諸書言性命者而辨之其謂經典未嘗離氣質以言性蓋駁張子

義理之性氣質之性之說後來李光地孟子劄記
榕村語錄皆與自強所論同然自強之書外閒實
無傳本光地蓋闇與合耳

魯齋心法一卷

浙江巡撫
採進本

元許衡撰衡有讀易私記已著錄是書刻於嘉靖
元年前有懷慶府知府洪洞韓士奇序稱正德庚
辰得魯齋全書其行實文章備之矣既而得其寫
本心法細閱之的然見我魯齋行實文章所以重
於世者悉自斯錄中流出則斯錄視全書之補於

世何如酷愛之惜勿傳因廣以梓云云今考此書
卽全書中語錄之下卷而摘其語錄上卷之三十
二條亂其次第竄入其中非全書之外別有此書
也士奇所云失考甚矣其斯以爲書帕本歟

聖賢語論二卷

浙江朱彝尊家
曝書亭藏本

元王廣謀編廣謀始末未詳其書以禮記家語史
記諸書所載孔子言行始於相魯終於公西赤分
四十四篇卷首有孔子像素王事實又載至元十
年所定廟制及祭祀儀注樂章後有嘉靖癸巳書

林余氏自新齋跋語蓋明人所重刊也卷端題曰
新刊標題明解聖賢語論豈當時各路或以孔子
遺語命題試士歟元史選舉志延祐條格所不載
莫之詳矣其書體例龐雜註亦淺陋雖元人舊本
殊不足錄何孟春註家語稱有元王廣謀本多所
竄亂今未之見此書當卽一時所成也

聖學心法四卷

江蘇巡撫
採進本

明成祖文皇帝撰前有永樂七年御製序謂以君
道父道臣道子道揭其綱其下分而爲目有統言

者焉有專言者焉今案首三卷及第四卷之前半
皆言君道自統言以外分子目二十有五第四卷
之後半卷則以父道子道臣道附之父道子道有
綱無目臣道亦首爲統言而分列四子目所採皆
經史子集之文每條後各有附註考實錄載永樂
七年二月甲戌上出一書示翰林學士胡廣等曰
朕因閒暇採錄聖賢之言今已成書卿等試觀之
有不善更爲朕言廣等觀覽畢奏曰帝王之要備
載此書請刊印以賜上曰然遂名曰聖學心法命

司禮監刊行上親為之序則此書實成祖所自編不由詞臣擬進其序以唐文皇作帝範十二篇自比按成祖稱兵篡位悖亂綱常雖幸而成事傳國子孫而高煦宸濠寘鐓之類接踵稱戈咸思犯上實身教有以致之而乃依附聖賢侈談名教欲附於逆取順守自序委曲繁重至五千餘言抑亦言之不怍矣至於殺戮諸忠蔓延十族淫刑酷暴桀紂之所不為者夷然為之可謂無復人理而其序乃曰秦隋之君用法慘酷倚苛暴之吏執深刻之

文法外加法刑外施刑曾何有忠厚惻怛之意死人之血漂流於市受刑之徒比肩而立此仁人君子所以痛傷也云云天下萬世豈受此欺乎

性理備要十二卷

安徽巡撫採進本

明王三極撰三極號少墩仙游人是書成於萬歷丁亥取性理大全摘其要語以便誦習仍冠以成祖御製序去取不甚中理蓋坊刻陋本也

謹案此書因性理大全而刪削之皆永樂中所纂之原本故仍列永樂中所纂之原第若

楊道會之性理鈔鍾仁傑之性理會通詹淮
陳仁錫之性理綜要性理標題彙要皆顛倒
竄亂非復原文則仍各從其時代編之

顏子鼎編二卷

浙江巡撫
採進本

明徐達左編高陽剛補併註達左字良夫平江人
元季遁迹鄧尉山洪武初起爲建甯縣學訓導舊
本題爲元人誤也陽嘉興人始末未詳觀其持論
乃李贄何心隱之流耳考歷代史志無顏子書卻
應麟甲乙剩言稱明太祖時朝鮮國進顏子書卻

之知其僞託也惟宋張栻採經文爲希顏錄元高
安李純仁河北李盈遞相補益達左此編成於至
正庚子前有自序稱盈所編未及見純仁所編集
亦有未然因更定以成此編陽又因達左之書重
爲點竄首列達左舊目各註其當刪之由次列新
目各註其增入之數未有陽自識稱損益私裁先
後妄參蓋已非達左之舊矣考達左原序譏二家
於莊列之寓言雜取而不擇伊洛考亭之緒論猶
未盡舉而此本所引莊列連篇累牘且所註提唱

心學刺刺不休與達左之旨全乖蓋姚江未派借
顏子以闡禪宗遂使先儒編輯之本志竄亂無存
斯非特輕改古書抑亦厚誣先賢矣其曰鼎編蓋
卽鼎新之義卽其命名亦明季纖詭之習也

西村省已錄二卷

浙江范懋柱家
天一閣藏本

明顧諒撰諒字希武上虞人西村其別號也洪武
中以薦爲無錫縣教諭錄中皆論修省之道大旨
醇正詞亦平近易曉然持論未免稍迂其書一刻
於正統再刻於宏治萬歷九年其十六世孫充復

訪求舊本手寫而刊之

雜誠一卷

浙江范懋柱家
天一閣藏本

明方孝孺撰孝孺字希直一字希古號正學天台
人以薦召授漢中府學教授建文中官至翰林侍
講學士改文學博士燕王篡位抗節死事蹟具明
史本傳乾隆四十一年

賜諡忠文是書分三十八章所言皆立身行己之道於
日用爲切近已編入遜志齋集第一卷此乃宏治
辛酉蜀人鄒魯摘出別行之本也

夜行燭

無卷數 副都御史黃登賢家藏本

明曹端撰端有太極圖說述解已著錄明初理學以端為冠而其父崇事佛老端因採經傳格言切於日用者輯為此書名夜行燭以進其父其書分類編輯為目十有五大抵取淺顯易解之語

月川語錄一卷

河南巡撫探進本

明曹端撰端講學之書有理學要覽一卷性理論一卷又有儒家宗統譜存疑錄亡其卷數竝載于頃堂書目今皆未見是編乃真甯趙邦清輯其講

學之語為一卷非端之全書亦非端所自著不足以盡其底蘊然于頃堂書目載月川語錄作一卷則所見亦即此本矣

從政名言二卷

江蘇巡撫探進本

明薛瑄撰瑄有讀書錄已著錄按瑄年譜宣德元年四月服闋至都上章願就教職宣宗特擢為御史尋差監沅州銀場此書第二條稱吾居察院第四條稱余始自京師來湖南則作於奉使沅州時也其言皆切實通達然精要已見讀書錄中此其

緒餘矣

薛子道論一卷

編修程晉芳家藏本

舊本題明薛瑄撰皆自瑄讀書錄中摘出別立此名以炫俗聽蓋明末詭誕之習凡屬古書多改易其面目以求售雖習見如讀書錄者尙不免刪竄以市欺耳

明良交泰錄十八卷

江西巡撫採進本

明尹直撰直有名臣贊已著錄是編為其致仕以後所作成於宏治十七年而表上於正德六年書

中皆援引經史附以論斷一卷易三篇書十二篇二卷詩五篇春秋傳五篇禮記二篇孔子三篇孟子五篇三卷以下則備述歷代君臣問答之語治忽興衰之故始自漢高迄明孝宗而明事當古事二之一蓋亦范祖禹帝學多述宋代祖宗之意惟末卷自錄其獻納之詞連篇累牘雖序中引夏侯勝魏徵韓琦司馬光歐陽修楊士奇李賢為例然勝未嘗著書徵事為王方慶所集琦特自編奏議修與光與士奇與賢皆自為記載非自附諸古名

臣後表進於朝也明史直本傳載孝宗薄其為人令致仕宏治九年表賀萬壽併以太子當出閣上承華箴引先朝少保黃淮事冀召對帝卻之此書或亦是意歟

案直之進退未合儒者之道然其言則儒家之言列之儒家從其書也

朱子學的二卷

副都御史黃登賢家藏本

明邱濬編濬有家禮儀節已著錄是編上卷分下學持敬窮理精蘊須看鞭策進德道在天德章齋

等十篇下卷分上達古者此學仁禮為治紀綱聖人前輩斯文道統等十篇蔡衍鏡序曰上編自下學以至天德由事而達理而終之以韋齋所以紀朱子之生平言行猶論語之有鄉黨也下編自上達以至斯文由理而散事而終之以道統所以紀濂洛關閩之學之所由來猶論語之有堯曰也然濬闡朱子之言以示學者即仿朱子編近思錄小學之體足矣何必摹擬論語使之貌似聖人况揚雄王通之僭經朱子嘗深譏之濬之是編豈朱子所

樂受乎

居業錄類編三十一卷

兩江總督採進本

明胡居仁撰陳鳳梧編居仁有易象鈔已著錄鳳梧字文鳴廬陵人宏治丙辰進士官至右都御史巡撫應天是編几分三十一類類為一卷序云錄舊無詮次不便觀覽頃自山東巡撫改佐南臺舟次之暇輒手自編訂以類相從付門人無錫陳大尹名世校而刻之以廣其傳此本蓋從刻本傳寫者昔薛瑄讀書續錄亦有原本及分類二刻然論

者謂分類失瑄意此本亦猶是也

道一編六卷

浙江汪汝璠家藏本

不著撰人名氏編朱陸二家往還之書而各為之論斷見其始異而終同考陳建學部通辨曰程篁墩著道一編分朱陸同異為三節始焉如冰炭之相反中焉則疑信之相半終焉若輔車之相依朱陸早異晚同之說於是乎成矣王陽明因之遂有朱子晚年定論之錄與道一編輔車之說正相唱和云云然則此書乃程敏政作也敏政有宋遺民

錄已著錄

性理要解二卷

浙江鄭大節家藏本

明蔡清撰清有易經蒙引已著錄是編以性理要解為名而上卷題虛齋看太極圖說下卷題虛齋看河圖洛書說前有蘇濬序稱其冥搜之暇神游太極左圖右書字字而櫛之言言而綜之亦但舉二書其序詞氣拙陋殆出依託疑清本有此殘藁其後人彙為一編強立此名又偽撰濬序於前也

虛齋三書

無卷數 浙江巡撫採進本

明蔡清撰是編即以看太極圖說改名太極圖說以看河圖洛書說改名河洛私見而增以艾菴密箴五十條故曰三書乾隆壬戌其裔孫蔡廷魁所刊其名亦非清所自題也

白沙遺言纂要十卷

衍聖公孔昭煥家藏本

明張詡編詡字廷實南海人成化甲辰進士官至南京通政司左參議嘗受業於陳獻章明史儒林傳附載獻章傳末是編採獻章白沙文集中語仿南軒傳道粹言例分為十類以闡新會之本旨獻

章之學當時胡居仁張懋等皆以為禪詡溺禪尤深即獻章亦頗訾之略見於羅欽順湛若水問答書中云

文公先生經世大訓十六卷

禮部尚書曹秀先家藏本

明余祐編祐字子積鄱陽人宏治庚戌進士官至雲南布政使內召為太僕寺卿未及行又擢吏部侍郎未聞命而病卒明史儒林傳附見胡居仁傳中祐居仁之門人又其壻也是書成於正德甲戌採朱子文集語類二書分類排纂為三十六門別

無一字之發揮其曰大訓蓋取與天球河圖竝重之義然書所稱者乃古聖先王之教典非大賢以下所敢受恐未必合朱子意也

近言一卷

山西巡撫採進本

明顧璘撰璘有國寶新編已著錄是書凡十三篇而未一篇為序志其體例仿揚雄法言王符潛夫論其篇名則取之劉勰文心雕龍也所論皆持身涉世之道大致平正無疵而亦無深義

傳習錄略一卷

編修程晉芳家藏本

不著編輯者名氏取王守仁傳習錄刪存大略
曹溶收入學海類編者明史藝文志載王守仁
傳習錄四卷聚樂堂書目有戴經傳習錄節要
一卷會稽縣志有劉宗周陽明傳習錄選皆無
傳習錄略之名未有鄒元標跋語然亦但云嘗
讀傳習錄不云有所刪輯蓋以傳習錄跋移綴之
均非其舊也

慎言十三卷

衍聖公孔昭
煥家藏本

明王廷相撰廷相字子衡儀封人宏治壬戌進士

官至兵部尙書事蹟具明史本傳是編前有嘉靖
丁亥自序稱仰觀俯察驗幽核明有會於心卽記
於冊二十餘年言積數萬類分爲十三篇附諸集
以藏於家又論諸儒之失有曰擬議過貪則援取
必廣性靈弗神則詮擇失精由是芻涉九流淫及
緯術卒使牽合附會之妄以迷乎聖人中庸之軌
云云持論大抵不詭於正然以擬議過貪詆諸儒
故罕考羣言以性靈弗神詆諸儒故多憑臆見甚
至併五行分屬四時亦以爲必無之理則愈辨而

欽定四庫全書總目卷九十五
愈慎矣本傳稱廷相博學好議論以經術稱於星
歷輿圖樂律河圖洛書及周程張朱之書皆有所
論駁然其說多乖僻良得其實云

欽定四庫全書總目卷九十五

番禺張錫麟初校
番禺高學耀覆校

欽定四庫全書總目卷九十六

子部六

儒家類存目二

後渠庸書一卷

編修程晉
芳家藏本

明崔銑撰銑有讀易餘言已著錄此其筆記之文
如論春王正月爲周正幽贊於神明而生著爲用
策論易不本於先天圖在今日爲已定之論在明
人則爲卓識矣又曰圖象繁而易荒矣小序廢而
詩蕪且淺矣左氏輕而春秋虛矣喜新變古君子

無樂乎斯焉耳又曰宋人之說古事也多以其意
億之始猶昭然也習之久遂若真者誣矣哉九講
學家所不冝言者銑獨不巧言回護亦絕無門戶
之私然諸條皆見所作士翼中殆後人摘鈔偽立
此名曹溶不及詳核誤收入學海類編耳

同異錄二卷

浙江鮑士
恭家藏本

明陸深撰深有南巡日錄已著錄是書採漢以來
名臣奏疏雜文有關於典章政事之大者節而錄
之分爲二卷上篇曰典常下篇曰論述每條之
末各附以論斷大旨欲取古人成說相其緩急

而通之於當世之務其書始脫橐於閩中及提學
山西重加詮次欲奏上之旣而不果其進書原序
猶存卷首書中凡原文有陛下云云者俱空白二
字而註其下云前朝臣子尊稱君上之文義當避
闕然古來傳寫舊文實無此例世所見石經尙書
於帝字王字均未有避闕者也

心性書

無卷數 浙江
巡撫探進本

明湛若水撰若水有二禮經傳測已著錄是書首
列心性圖圖後有說復集心性通三十五章其

門人黃民準鍾景星周學心袁郵郭肇乾謝錫命
湛天潤爲之註與贊霍任又著或問數十條以發
明之蓋欲仿周子太極圖說通書也

楊子折衷六卷

浙江鄭大節家藏本

明湛若水撰宋儒之學至陸九淵始以超悟爲宗
諸弟子中最號得傳者莫如楊簡然推行九淵之
說變本加厲遂至全入於禪所著慈湖遺書以心
之精神是謂聖一語爲道之主宰而以不起一意
使此心虛明洞照爲學之功夫其極至於斥大學

非聖言而謂子思孟子同一病源開後來心學之
宗至於宵冥恍惚以爲獨得真傳其弊實成於簡
若水因當時有梓其書者乃卽其所言條析而辨
之凡書中低一格者簡之說平格者若水之論也

遵道錄八卷

江蘇巡撫探進本

明湛若水撰所輯皆明道程子之說其曰遵道者
自序爲遵明道也若水從陳獻章游生平所至必
建書院以祀獻章初與王守仁同講學後各立宗
旨守仁以致良知爲宗若水以隨處體驗天理爲

宗守仁言若水之學求之於外若水亦謂守仁格致之說不可信者四學者遂分王湛之學若水得力於獻章每教人靜坐其學灑然獨得故於宋儒中獨推尊明道所謂學焉而得其性之所近也此本凡八卷衍聖公孔昭煥所進本則作十卷蓋當時原有兩刻明史藝文志作十卷所據卽孔氏本也

甘泉新論一卷

編修程晉芳家藏本

明湛若水撰若水之學以虛明爲宗故其論心則

以爲主一而無物其論性則以宋儒理氣對舉爲非視程朱所論頗殊千頃堂書目載甘泉明論十卷又甘泉新論一卷其明論今未見此本則曹溶學海類編所載也

論學要語一卷洞語一卷接善編一卷人倫外史一卷

江西巡撫採進本

明劉陽撰陽字一舒安福人由舉人授碭山縣知縣官至監察御史陽初從族人劉曉受經曉告以王守仁之學遂往謁守仁於贛州故要語洞語大

率不離良知之旨其接善編多採先儒粹語非所
自作其人倫外史卽墓誌傳狀詩詠等作以其人
係於孝弟忠義貞節之大故以外史爲名舊總題
曰劉兩峯集然實非詩文之屬未可著錄於集部
故分列其目錄之儒家類焉

閑闢錄十卷

浙江巡撫
採進本

明程瞳撰瞳有新安學系錄已著錄是編錄朱子
集中辨正異學之語以闢陸王之說凡九卷末一
卷則雜取宋史以下諸家之論朱陸者其說不爲

不正而門戶之見太深詞氣之間激烈已甚殊非
儒者氣象與陳建學菽通辨均謂之善罵可也江
南通志載瞳所著尙有新安文獻紫陽風雅二書
今竝未見然大略可睹矣

苑洛語錄六卷

副都御史黃
登賢家藏本

明韓邦奇撰邦奇有易學啟蒙意見已著錄是書
皆平日論學之語及所記錄時事輯爲一編本名
見聞考隨錄已編入所著苑洛集中惟集本五卷
此本作六卷所載雖稍有出入而大略皆同蓋此

本乃邦奇門人山西參議白璧所刊前有璧序稱刻而題之曰苑洛先生語錄疑又為璧所重編也

願學編二卷

陝西巡撫採進本

明胡纘宗撰纘宗有安慶府志已著錄此編乃其講學之語成於嘉靖甲寅時纘宗年已七十五矣關中之學大抵源出河東三原無矜奇弔詭之習纘宗又師羅欽順而友魏校湛若水何塘呂柟馬理故所論頗為篤實其解大學用古本而不廢朱子格物之說雖與王守仁異趨而稱其如程門之有

游楊亦無門戶詭爭之習然核其全書大抵皆先儒所已言也

近取編二卷

陝西巡撫採進本

明胡纘宗撰是編取朱子要語釐成二卷名曰近取者謂取諸日用切近以救宗金谿者之弊殆為王守仁發也

海樵子一卷

編修程晉芳家藏本

明王崇慶撰崇慶有周易議卦已著錄是編僅二十六則多摹仿王通中說周子通書張子正蒙之

體大抵老生常談末一條論為將必用儒者謂有
張良之楚歌則項羽之魂自禡有諸葛之雲鳥則
南人之反自定夫渡瀘之役未必徒恃陣圖至於
四面楚歌出自張良史記漢書皆不載不知其何
所本矣

東石講學錄十一卷

浙江范懋柱家
天一閣藏本

明王奠撰奠有忠義錄已著錄是集為其門人黃
文龍所編皆平生講學之語奠與陸九淵為鄉人
故其說一以九淵為本云

心學錄四卷

浙江范懋柱家
天一閣藏本

明王奠撰是編乃奠養親家居之時取陸九淵之
言擇其發明心學者彙為一編凡五百二十條而
以己意推闡之大旨亦主王守仁晚年定論

大儒心學語錄二十七卷

江蘇巡撫
採進本

明王奠撰是編亦其歸養之時所輯諸儒語錄凡
周子程子張子邵子楊時謝良佐呂大臨尹焞羅
從彥李侗胡宏朱子陸九淵張栻呂祖謙黃榦蔡
沈陳淳真德秀薛瑄吳與弼陳獻章胡居仁二十

四家皆論心學之語也

性理羣書集覽七十卷

江蘇巡撫採進本

不著撰人名氏但題瓊山玉峯道人集覽不知為誰其書取永樂性理大全中人名地名年號訓詁之類依王幼學通鑑綱目集覽之例各為註釋有增註者即別標為附錄然淺陋殊甚如太極圖說後遂寧傳者伯成句於遂寧下則詳註傳者下則註未詳出處又如律呂新書內於梁武帝之通則註於晉荀勗之笛則不註蓋出不學者所為卷尾

有大德辛未刊行字尤為舛謬是書本註性理大全安得大德中先有刊本考辛未為明正德六年此售偽者以版式近麻沙舊本故削補正字偽冒元刻也

三難軒質正

無卷數浙江巡撫採進本

明戴金編金字純夫漢陽人正德甲戌進士官至兵部尚書金自以力行責已克終三者甚難因取以名軒而徵集同時士大夫所贈詩詞序記論說銘贊彙成是編然學在實踐既知三者之難則自

勉而已矣徵文刻集何爲也且以是三者爲難雖
聖賢不以爲非本無疑義又安用質正乎

正學編二卷

浙江范懋柱家
天一閣藏本

明陳琛撰琛有易經淺說已著錄是書已編入所
著紫峯集中此其別行之本凡二十一篇各立篇
名全擬通書正蒙之體未免刻畫之嫌然依傍先
儒不敢出入持論尙無疵謬未附秋夜感興詩十
絕句亦力摹康節擊壤之派其宗尙可知矣

說理會編十五卷

浙江巡撫
採進本

明季本撰本有易學四同已著錄本爲王守仁門
人自序謂親聞姚江之傳而同門之士傳布師說
徧天下恐其爲說既長或乖典則故輯此書凡疑
難之說悉辨明之其意蓋擬守仁於濂洛而此書
則仿近思錄而作近思錄分類十四此分類十二
其先之以性理聖功者猶錄之首及道體論也
繼之以實踐賢才者猶錄之次及於致知存養克
治也推之於政治者猶錄之有治道治法也終之
以異端諸子者猶錄之辨別異論總論聖賢也其

閒巧借程朱之言以證良知之說則猶守仁朱子
晚年定論之旨耳

困辨錄八卷

浙江巡撫
採進本

明聶豹撰豹字文蔚永豐人正德丁丑進士官至
兵部尙書諡貞襄事蹟具明史本傳豹之學出於
姚江是編乃其嘉靖丁未繫詔獄時所劄記分辨
中辨易辨心辨素辨過辨仁辨神辨誠八類羅洪
先爲之批註

燕居答述二卷

浙江巡撫
採進本

明戴經撰經德清人聶豹之門人也是編皆述豹
講授之語下卷又別題曰疑總問日見條問日見
條註疑問諸目大抵困辨錄中所已具經特以已
所獲聞者別加編綴故往往復出焉

研幾錄

無卷數 河南
巡撫採進本

明薛侃撰侃有圖書質疑已著錄是書乃侃門人
鄭三極所編侃承姚江餘緒故屢稱引良知之說
其儒釋辨謂世之疑先生之學類禪者三曰廢書
曰背考亭曰虛侃一一辨之黃宗羲明儒學案謂

此淺於疑陽明者皆不足辨也況言元寂言虛無
愈辨愈支竝王氏本旨亦為侃所累矣

庸言十二卷

江蘇巡撫
採進本

明黃佐撰佐有泰泉鄉禮已著錄是編乃其致仕
後講學語錄分學道修德求仁游藝制禮審樂政
教事業著述象數天地聖賢十二類

慎言集訓二卷

浙江鮑士
恭家藏本

明敖英撰英字子發清江人正德辛巳進士官至
河南右布政使是書上卷二十二目二百四十二

條以戒多言為首下卷十目九十二條以言貴簡
為首採經史子集分類編次而閒附已說於其下
蓋英督學陝西時刊以示諸生者也

辨惑續編七卷附錄二卷

浙江巡撫
採進本

明顧亮撰亮字寅仲長洲人正德中况鍾為蘇州
府知府嘗聘致幕中是書以世俗養生送死大抵
為吉凶拘忌師巫之說所惑因輯古今書傳分為
七門首日原理言人之所以為邪說所惑者由於
此理之不明次日事生言事親之要日應變日奠

祭日擇墓日送葬日拘忌則皆論喪葬之事也又
爲附錄二卷論生死輪迴壽夭貧富貴賤吉凶禍
福諸事及師巫邪術之害專爲鄉俗之弊而作故
註釋字義詞皆淺近取其易曉其稱辯惑續編者
蓋元謝應芳先有辯惑編此申明其說也

擬學小記六卷續錄一卷

浙江巡撫
採進本

明九時熙撰時熙字季美自號西川居士洛陽人
嘉靖壬午舉人官國子監博士事蹟具明史儒林
傳時熙師事劉魁傳王守仁良知之學有所心得

輒爲筆記其壻李根與其雜著編次之時熙自序
謂名擬學者言擬如此爲學而未知其是否也書
中於魁稱晴川師於守仁則稱老師不忘所本也
凡分六目一經擬二餘言三格訓通解四質疑五
雜著六紀聞未有附錄數則明史稱時熙議論切
於日用不爲空虛隱怪之談今觀其書大抵以心
爲宗卽董仲舒道之大原出於天語亦以爲舍心
言天卽爲義外而中庸之中直訓爲中外之中以
與心學相比附又謂中庸論道理多分兩截具兩

景不如孟子之直截又謂子夏子游之言皆主務本皆有支離之病又謂危行言遜及文質彬彬皆非聖人之言猶是姚江末派敢爲高論者也

心齋約言一卷

編修程晉芳家藏本

明王艮撰艮字汝止泰州人王守仁之門人明史儒林傳附載王畿傳中此書皆發明良知之旨中有稱先生者皆指守仁明史藝文志載心齋語錄二卷此本改其名曰約言又止一卷亦學海類編之節本也

一菴遺集二卷

兩江總督採進本

明王棟撰棟字隆吉號一菴泰州人嘉靖中由歲貢生補江西南城訓導遷深州學正初王守仁良知之學有泰州一派始於王艮棟爲艮從弟故獨得其傳所至皆以講學爲事集分二卷上卷曰會語正集續集下卷曰論學雜吟及各體詩文并其門人李樾所記誠意問答之語黃宗羲明儒學案嘗稱棟意非心之所發一語爲獨得宗旨而又謂泰州之學時時不滿師說益啟瞿曇之祕致躋陽

明而為禪云

緒山會語二十五卷

江蘇周厚
培家藏本

明錢德洪撰德洪有平濠記已著錄明史儒林傳稱四方士從王守仁學者皆德洪與王畿先為疏通其大旨而後卒業於守仁事守仁四十年嘗刻陽明文錄故稱王氏學者以錢王為首又稱德洪徹悟不及畿畿持循亦不如德洪然畿竟入於禪而德洪猶不失儒者矩矱是編為其子應樂所刊前四卷為會語講義五六兩卷為詩七卷以下為

雜文第二十五卷則附錄墓表誌銘雖其詩文集而大致皆講學之語故仍總名曰會語今亦著錄於儒家焉

東溪蔓語一卷

浙江范懋柱家
天一閣藏本

明曹煜撰煜浮梁人嘉靖丙戌進士其仕履未詳據書中自言則嘗為縣令者也其書皆講學之語持論頗淳正然多抄撮二程之言以鄉曲之私推吳與弼過甚於石亨一事至以孟子稱孔子者稱之殊為曲筆又如居家友愛居官德感及近來進

益諸條皆自暴所長殆淺之乎為人矣

諸儒語要二十卷

浙江巡撫採進本

明唐順之編順之有廣右戰功錄已著錄是編採諸儒之言十四卷以前以人分凡周子二程子張子謝良佐楊時胡宏朱子張栻陸九淵楊簡王守仁十有二人十五卷以下以類分其為某人之言或註或不註閱之殊不甚了了

凌濱語錄二十卷

直隸總督採進本

明蔡震撰震字天章號凌濱甯晉人嘉靖己丑進

士官至監察御史巡按河南震少從韓邦奇湛若水游故講學宗旨不出二家其論周禮謂遺公孤而詳細職詳略失宜又謂六卿之上皆有惟王建國體國經野數語亦覺繁複則一隅之見也

廉矩一卷

編修程晉芳家藏本

明王文祿撰文祿字世廉海鹽人嘉靖辛卯舉人此編凡十八章皆以訓廉為主其文似箴似銘欲摹古而適成屬體其義則了不異人其必十八章者殆欲合孝經之數為忠經之重儷特未敢自題

曰經耳

道林諸集

無卷數 浙江巡撫採進本

明蔣信撰信字卿實常德人嘉靖壬辰進士官至貴州提學副使嘗師王守仁又師湛若水明史儒林傳附載湛若水傳末是編乃其卜築桃岡時與諸弟子講學之書而其門人章評所刊者首古大學義專釋大學次桃岡講義摘取論孟諸條附以論斷又桃岡日錄則與門人問答語錄也桃岡訓規則讀書日程也傳疾錄則疾痛時記也史稱信初

從守仁游時未以良知教後從若水游最久其學得之若水者為多又稱其踐履篤實不尚虛談蓋猶未盡入於禪者卷末有附談一則稱評為斗陽子讀書九山者二十年有太乙丈人者哂之無名先生者論之恟恍無憑斯則末流放失全入於二氏者矣西田語略二十三卷續集二十九卷內府藏本明樊深撰深有河閒府志已著錄此書皆雜鈔先儒語類以多為貴無所發明

識仁定性解註二卷

浙江巡撫採進本

次定四庫全書總目卷九十六

子部 儒家類存目二

明何祥撰祥字克齋內江人嘉靖甲午舉人是編
後有羅節跋稱祥以丁未入太學時歐陽德爲祭
酒傳陽明之學祥獲師事之日究奧義嘗闡性理
得明道先生識仁論定性書好之不忘遂爲註解
今檢此書卷一爲識仁定性解卷二則自警語十
條自警箴七則南野語錄七段太洲語錄六段復
麻坡劉魯橋書一篇據王任重序尙有恤刑彈劾
反觀諸論及五官問荅等篇而書中無之蓋非完
本其總名惟稱識仁定性解註亦不該括莫詳其

義也祥之學出於姚江此書所論皆發明心學

薛方山紀述一卷

浙江鮑士
恭家藏本

明薛應旂撰應旂有四書人物考已著錄此其平
日所鈔先正格言前有自識稱凡所聞於師友輒
爲紀之間有自得亦附書焉置之几案少裨循省
曰述者明非已作不敢冒立言之責書分上下二
篇上篇皆論性命之理下篇則論治道也

薛子庸語十二卷

浙江巡撫
採進本

明薛應旂撰是編乃其講學之語分二十四篇各

欽定四庫全書

卷九十六

子部 儒家類存目二

十七

以首二字爲篇名而每條冠以薛子曰大意欲如揚雄之擬論語其門人向程爲之音釋

二谷讀書記二卷

編修程晉芳家藏本

明侯一元撰一元字舜舉樂清人嘉靖戊戌進士官至江西布政使此編乃其讀書雜記多推闡四書之義大抵前人所已言中間謂陽明之學遺却格致本旨又謂朱子談理過於分析陽明起而病之由於相激而成亦頗有見也

禮要樂則二卷

浙江巡撫採進本

明阮鶚撰鶚桐城人嘉靖甲辰進士官至右副都御史巡撫福建事蹟附見明史胡宗憲傳此書乃其以御史督學直隸時所作以教諸生者禮要分冠昏喪祭飲射六門引三禮原文於前凡四書中涉及禮制者亦酌取之皆人所共知別無發明之處樂則分五倫爲五門取詩經數章以實之如君臣則載鹿鳴皇華諸篇父子則載凱風小弁諸篇先列經文而節取集傳數語附其下後又有所頒僚屬吏民約一篇

學部通辨十二卷

內府藏本

明陳建撰大旨以佛與陸王爲學之三部分前編後編續編終編每編又自分上中下而採取朱子文集語類年譜諸書以辨之前有嘉靖戊申自序云專明一實以抉三部前編明朱陸早同晚異之實後編明象山陽儒陰釋之實續編明佛學近似惑人之實而以聖賢正學不可妄議之實終焉按朱陸之書具在異同本不待辨王守仁輯朱子晚年定論顛倒歲月之先後以牽就其說固不免

矯誣然建此書痛詆陸氏至以病狂失心目之亦未能平允觀朱子集中與象山諸書雖負氣相爭在所不免不如是之毒詈也蓋詞氣之閒足以觀人之所養矣

格物圖一卷

陝西巡撫採進本

明孫丕揚撰丕揚字叔孝富平人嘉靖丙辰進士官至吏部尚書諡恭介事蹟具明史本傳是編分四篇一曰格物圖二曰明物解三曰原物辨四曰人物鏡意其原有總名傳寫佚之而以第一篇爲總名也

其圖分物始物格物終為三物始物終皆畫一圓
圈如周子之無極物格則大圈中畫一小圈小圈
之中書聖人成能字小圈四旁分列天清地甯物
阜民安八字大旨闢王守仁良知之說而謂道無
可名名之曰物然守仁求之無定之心而不揚又
求之無物之道其說雖變其實一也

論學篇一卷

陝西巡撫
採進本

明孫丕揚撰丕揚既撰格物圖復為講學三篇一
為格物工夫一為良知明辨一為心學始終皆申

明格物圖中之意也

耿子庸言二卷

浙江巡撫
採進本

明耿定向撰定向有碩輔寶鑑要覽已著錄是編
為所著語錄凡七篇首繹經次冲言次輯聞次比
弦次學筌次牧要次切德定向之學出於泰州王
艮本近於禪然有鑒於末流之狂縱不甚敢放言
高論故初請李贄至黃安既而惡之而贄亦屢短
定向然議論多而操履少遂不免有迎合張居正
事為清議所排講學之家往往言不顧行是亦一

證矣

胡子衡齊八卷

浙江鄭大節家藏本

明胡直撰直字正甫泰和人嘉靖丙辰進士官至福建按察使直之學出於歐陽德及羅洪先故以王守仁為宗嘗與門人講學螺水上輯其問答之語為是書分言末理問亡錮博辨明中徵孔談言續問申言凡九篇篇有上下其名衡齊者意謂談理者視此為均平云爾大要以理在心而不任天地萬物意在疏通守仁之旨然守仁本謂我與天

地萬物一氣流通無有礙隔故人心之理即天地萬物之理而直乃謂吾心所以造天地萬物匪是則黝沒荒忽而天地萬物熄矣是竟指天地萬物為無理與守仁亦不相合未免太失之高遠其文章則縱橫恢詭頗近子書與他家語錄稍異蓋直少攻古文詞年二十餘始變而講學故頗能修飾章句無舛陋粗鄙之狀云

大儒學粹九卷

江西巡撫採進本

明魏時亮編時亮字敬吾南昌人嘉靖己未進士

官至工部侍郎事蹟具明史本傳史稱時亮初好
交游負意氣中遭挫抑潛心性理是書取周子二
程子張子朱子及陸九淵薛瑄陳獻章王守仁九
家之言人各爲卷大旨謂孔子之道顏以敏悟曾
以魯得濂溪明道象山白沙陽明則顏子之入道
可幾焉伊川橫渠晦菴敬軒則曾子之入道可幾
焉要之道無二學無二其所至亦無二也蓋主調
停之說者本傳稱其官兵科給事中時請以薛瑄
陳獻章王守仁竝從祀文廟猶是志也

三儒類要五卷

江蘇巡撫
採進本

明徐用檢編用檢字魯源蘭溪人嘉靖壬戌進士
官至南京太常寺卿是書彙錄薛瑄陳獻章王守
仁語錄分類排纂釐爲五門曰志學曰爲仁曰政
治曰性命曰游藝其大旨亦與魏時亮同

李見羅書二十卷

江蘇巡撫
採進本

明李復陽編皆其師李材講學之語材字孟誠豐
城人嘉靖壬戌進士官至右僉都御史巡撫鄖陽
事蹟具明史本傳材嘗患世之學者每以朱王兩

家格物致知之說爭衡聚訟因揭修身爲本一言以爲孔曾宗傳而謂知止卽知本又謂格物之功散見八條目中以朱子補傳爲誤其學較姚江末派稍爲近實故顧憲成頗稱之然材在鄖陽侵營地爲書院至於激變諸軍狼狽棄城僅以身免及被劾遣戍猶用督撫儀從赴謫所爲當代所非黃宗羲明儒學案記之最詳則亦何貴乎講學耶是編凡大學古義一卷道性善編一卷論語大意四卷書問九卷門人記述四卷而以舊本序別綴於

末爲一卷復陽爲無錫知縣時所刊也

心學宗四卷

浙江巡撫採進本

明方學漸撰學漸有桐彝已著錄是書專明心學自堯舜至於明代諸儒各引其言心之語而附以已註其自序云吾聞諸舜人心惟危道心惟微聞諸孟子仁人心也聞諸陸子心卽理也聞諸王陽明至善心之本體一聖三賢可謂善言心也矣蓋學漸之說本於姚江故以陸王並稱而書中解人心惟危爲高大意解不愧屋漏爲喻心曲隱微解

格物爲去不正以歸於正大意皆主心體至善一
闢虛無空寂之宗而力斥王畿天泉證道記爲附
會故其言皆有歸宿憲成序其首曰假令文成復
起亦應首肯蓋雖同爲良知之學較之龍溪諸家
猶爲近正云

日言一卷

衍聖公孔昭
煥家藏本

明孔承佃撰承佃字永冠曲阜人先聖六十代孫
官保定縣知縣終於荆王府長史是書乃承佃劄
記之文其學出於王守仁故以鐘柝喻性明其本

空又云朱晦翁中年學尙未悟至晚年則甚悔今
人不於悟處用功却於其悔處執迷惑矣是卽守
仁晚年定論之說也

性理圖說一卷

浙江巡撫
採進本

明徐中撰中字成中鄱陽人其目分無極天道性
命諸類語多陳因無足採錄

一書增刪四卷

浙江巡撫
採進本

明俞邦時撰邦時號敬軒新昌人是編名曰一書
者以一爲本也第一卷曰元卷爲傳四曰一元兩

儀三才四象第二卷曰副卷為傳四曰一天兩地
三人四物第三卷曰參卷為傳四曰一期兩至三
和四時第四卷曰輔卷為傳二曰河洛律呂總三
百六十六章以當周天之數大意欲配張子正蒙
邵子皇極經世而刻畫皮毛去之轉遠書成於隆
慶丁卯刊於萬歷癸酉再刊於

國朝康熙壬子皆名一書此本為第三刻乃康熙已
卯呂夏音所增刪故題曰一書增刪云

性理鈔二十卷 副都御史黃登賢家藏本

明楊道會撰道會字惟宗晉江人隆慶戊辰進士
歷官至湖廣左布政使是編取性理大全刪節繁
冗前有萬歷戊子王道顯序稱其更定者十之一
而裁割者十之九然去取多未得當蓋亦書帕本

耳

諸儒學案八卷 江西巡撫採進本

明劉元卿撰元卿有大象觀已著錄是書輯周子
二程子張子邵子謝良佐楊時羅從彥李侗朱子
陸九淵楊簡金履祥許謙薛瑄胡居仁陳獻章羅

欽順王守仁王艮鄒守益王畿歐陽德羅洪先胡直羅汝芳二十六家語錄而益以耿定向之說元卿定向弟子也其學本出於姚江程朱一派特擇其近於陸氏者存之耳

憲世編六卷

浙江巡撫採進本

明唐鶴徵撰鶴徵有周易象義已著錄是編發明心性之學首列孔子顏子仲弓子貢曾子子思孟子次列周子二程子張子邵子楊時朱子張栻次列陸九淵楊簡薛瑄陳獻章王守仁王艮羅洪先

唐順之羅汝芳王時槐各述其言行而論之大旨主於牽朱就陸合兩派而一之

羣書歸正集十卷

副都御史黃登賢家藏本

明林昺撰昺號方塘鄞縣人隆慶中諸生此書爲昺八十四歲時作本四十二卷其從孫御史祖述刪爲十卷其十六門則仍其故書中皆援引舊文斷以正理然不過老生常談人所共知者也

呻吟語六卷

副都御史黃登賢家藏本

明呂坤撰坤有四禮質疑已著錄此編上三卷爲

內篇下三卷為外篇蓋萬歷壬辰刊本也晚年又手自刪補為呻吟語摘二卷彌為簡要故此本附存其目焉

呂子節錄四卷補遺二卷

兩江總督採進本

國朝陳宏謀編宏謀有大學衍義輯要已著錄此編亦呻吟語之節本初刻於乾隆丙辰後於戊午八月復得坤原書知從前所據乃摘鈔之本多所挂漏因採錄初刻所遺者復為補遺二卷然摘鈔之本實坤所自定也宏謀掇拾其所棄蓋未考也

唯言十卷

江蘇巡撫採進本

明范涑撰涑有兩浙海防類考已著錄此編隨筆劄記亦語錄之類前有小引稱所著筆記二十卷起辛巳迄戊申以年為次每年有唯言附其後因錄出別為一冊凡八卷其後二卷起己酉迄癸丑蓋續所增入也

中銓六卷

安徽巡撫採進本

明汪應蛟撰應蛟有古今彝語已著錄是編皆其講學之語起萬歷丁亥至乙卯凡二十年多詳於

儒釋之辨而於王守仁所云無善無惡心之體一
語論之尤詳以當日諸儒各立門戶應蛟欲無所
偏倚故以中詮爲名云

王門宗旨十四卷

浙江巡撫
採進本

明周汝登編汝登有聖學宗傳已著錄是編首載
王守仁講學之語竝其奏疏雜著詩文而以王艮
徐曰仁錢德洪王畿之說次焉蓋督學陳大綬之
意而汝登編次之書成之後陶望齡又爲校定汝
登嘗供羅汝芳像節日必祭祀之南都講會拈天

泉證道一篇相發明又嘗作九解以伸無善無惡
之說首載汝登自序云首稱宗者明爲千聖之嫡
嗣也數門人語附見而概系之王門者統於宗無
二旨之義也然姚江再傳以後去其師之本旨益
遠汝登此編徒爭王學之門戶實不足以發明王
學也

信古餘論八卷

江蘇巡撫
採進本

明徐三重撰三重有餘言已著錄是編乃其講學
語錄江南通志稱所著庸齋日記及此書皆可垂

世範俗然理氣性命之說幾居其半以道之大原言之固屬推究根本以學者之實踐言之又不免為枝葉矣

庸齋日記八卷

江蘇巡撫採進本

明徐三重撰是書前一卷說易後七卷說四書皆隨意標舉非循文箋註蓋借經義以發揮其講學之旨耳

鄒南阜語義合編四卷

浙江巡撫採進本

明鄒元標撰元標字爾瞻吉水人萬歷丁丑進士

官至左都御史諡忠介事蹟具明史本傳是編乃其門人所輯以講學者曰會語說經者曰解義故總名曰語義合編元標以氣節重一時其立首善書院卒釀門戶之爭功不補過其學亦源出姚江不能一一沾實然其人則不愧於儒者故仍存其目於儒家焉

道學正宗十八卷

副都御史黃登賢家藏本

明趙仲全撰其子健校補前列河洛諸圖而以古今聖賢分正宗羽翼兩門大旨以道德純粹功業

竝隆及學術醇正者尊爲正宗首伏羲神農以迄
明羅欽順羅洪先諸人其造詣未至見道未的功
業雖隆而所學未純者附爲羽翼首顓頊高辛以
迄明湛若水呂柟諸人其平時言論有片語涉禪
寂者皆削置弗存持擇似乎甚嚴然實則隨意分
別絕無義例他姑無論如羅洪先羅欽順等俱列
之顓頊高辛之上而伯夷伊尹子夏子貢子游子
路反不及楊時胡安國此果不易之評乎仲全字
梅峯涇縣人仕履未詳健字行吾萬歷丁丑進士

官至通政司使是編乃其爲太僕寺卿時所作標
題稱後學管窺不肖男亦可異也

小心齋劄記十六卷

江蘇巡撫
採進本

明顧憲成撰憲成字叔時無錫人萬歷庚辰進士
官至吏部文選司郎中削籍歸起南京光祿寺少
卿移疾不赴終於家崇禎初贈吏部右侍郎諡端
文事蹟具明史本傳憲成里居與弟允成修宋楊
時東林書院偕同志高攀龍錢一本薛敷教史孟
麟于孔兼輩講學其中朝士慕其風者多遙相應

和聲氣既廣標榜日增於是依草附木之徒爭相
趨赴均自目為清流門戶角爭遞相勝敗黨禍因
之而大起恩怨糾結輾轉報復明遂以亡雖憲成
等主持清議本無貽禍天下之心而既已聚徒則
黨類眾而流品混既已講學則議論多而是非生
其始不過一念之好名其究也流弊所極遂禍延
宗社春秋責備賢者憲成等不能辭其咎也特以
領袖數人大抵風節矯矯不愧名臣故於是書過
而存之以示瑕瑜不掩之意云爾是書於萬歷戊

申同安蔡獻臣始為刻版其後刻於崑山然兩本
皆始於萬歷甲午終於乙巳止十二卷此本乃其
子與淳所刻益以丙午至辛亥所記增多四卷卷
數與明史藝文志合當為足本矣

顧端文公遺書三十七卷附年譜一卷

副都御史黃登賢家藏本

明顧憲成撰是編為其曾孫貞觀所彙刻首即小
心齋劄記十八卷次證性編六卷次東林會約一
卷次東林商語二卷次虞山商語三卷次經正堂
商語一卷次志矩堂商語一卷次仁文商語一卷

次南岳商語一卷次當下繹一卷次還經錄一卷
次自反錄一卷未附年譜四卷則其孫樞所編而
貞觀訂補者外別有以俟錄涇泉藏彙大學重訂
大學質言大學通考五書在初刻十種內者與未
刻之桑梓錄皆不列於是編以卷帙頗繁尙待續
刻故也

龜記四卷

編修勵守
謙家藏本

明錢一本撰一本有像象管見已著錄東林方盛
之時一本雖與顧憲成分主講席然潛心經學罕

談朝政不甚與天下爭是非故亦不甚爲天下所
指目是編乃其隨手劄記取詩遁勉從事之義故
題曰龜記自萬歷甲午以迄癸丑凡二十年意有
所得輒筆之於書其發明性道排斥二氏頗爲深
切其中間有過當者如引學記求之也佛句以闢
佛未免附會李日華六研齋筆記謂曲禮獻鳥者
佛其首句註訓佛爲違戾闢佛先生得之大喜云
云二人同時似聞一本之論故有此戲雖文人輕
薄之詞亦講學者好爲異說有以召其侮也

聖學範圍圖

無卷數 浙江鮑士恭家藏本

明岳元聲撰元聲字之初號石帆嘉興人萬歷癸未進士官至兵部侍郎此書一名範圍象教圖大旨以儒教統攝二氏以易中一陽一陰之卦併入剝復卦為剝復圖以範釋二陽二陰之卦併入坎離卦為坎離圖以範老三陽三陰之卦併入否泰卦為否泰圖以為儒宗其自序謂昉於孟子指點楊墨歸儒之意蓋宗王氏良知之學而好為新奇者耳

南雍誠勛淺言一卷

山西巡撫採進本

明傅新德撰新德字元明又字商盤定襄人萬歷己丑進士官至國子監祭酒贈禮部右侍郎諡文恪是編乃其官南京國子監司業署祭酒時訓導諸生之文凡誠言八條曰淫蕩酗酒鬪很罔利詞訟詭服黨比傲惰勛言八條則孝弟忠信禮義廉恥也

馮子節要十四卷

安徽巡撫採進本

明馮從吾撰從吾有元儒考略已著錄從吾以風

節著而亦喜講學無錫高攀龍高邑趙南星皆稱之時官京師會講都城至環聽者院宇不能容終亦以此招謗是編即其各地會講之語也

殘本文華大訓箴解三卷

浙江巡撫採進本

明吳道南撰道南有河渠志已著錄初憲宗成化十八年十二月以御製文華大訓二十八卷賜皇太子嘉靖八年世宗御製序文頒行道南因按其篇章前為之序次為之解次為之箴以嘉靖十四年正月表上此本僅存三卷已非完書

荷薪義八卷

內府藏本

明方大鎮撰大鎮字君靜桐城人萬歷己丑進士官至大理寺少卿始大鎮父學漸講學桐川大鎮追述父訓及與同社諸人問答之語詮次成帙名曰荷薪蓋亦不忘繼述之意其大旨在於闢良知之說於儒釋分別辨論極詳

增訂論語外篇四卷

浙江巡撫採進本

明潘士達編士達字在聞安吉州籍烏程人萬歷壬辰進士官至廣東提學僉事是書取諸子百家

所載孔子之言分類排纂做論語二十篇之數以
皆論語所不載故曰外篇以因南昌李棡舊槁而
葺之故曰增訂所採既罕異聞又莊列寓言亦復
闕入朱子語錄嘗稱孔門弟子畱下家語至今作
病痛况雜家依託之言乎

龍沙學錄六卷

江蘇巡撫
採進本

明王在晉撰在晉有歷代山陵記已著錄是編輯
宋儒程朱以下及明王守仁羅汝芳諸人之說而
註釋之大率鈔撮語錄無所發明其論良知格致

仍以姚江為宗特假程朱為重耳在晉誤國庸臣
而亦著書講學明季風氣觀此可以知矣

聖學啟關臆說三卷

浙江巡撫
採進本

明龍遇奇撰遇奇字才卿號紫海吉安人萬歷辛
丑進士官至監察御史是編乃其巡按陝西時與
諸生講學之語分為八關一曰迷悟二曰濃淡三
曰剝復四曰窮達五曰死生六曰聖凡七曰內外
安勉八曰門戶異同又於八關之中別為子目雜
引諸儒語錄以證之雖眾說兼陳而大旨則姚江

一派也

經書孝語

無卷數 浙江巡撫採進本

明朱鴻編鴻字子漸仁和人萬歷閒諸生是書撫五經四書中言孝之語為一帙而各為之發明附錄曾子孝實於末文既館飭論亦凡近殊無可取鴻嘗刻孝經而以此附之今既別本單行不可復溷於經部姑置之儒家類焉

證人社約言一卷

浙江巡撫採進本

明劉宗周撰宗周有周易古文鈔已著錄宗周初

以順天府尹罷歸與陶奭齡講學王守仁祠以證人名堂此其所為條誠也首冠以社學檄題辛未三月蓋崇禎四年所作次為約言十則次為約戒十則所載凡三十條題曰癸未秋日為崇禎十六年次為社會儀七則不題年月次為宗周自書後而附以荅管而抑論遷改格書其書中後所稱石梁子者即奭齡之別號奭齡字君奭國子監祭酒望齡弟也

劉子節要十四卷

浙江巡撫採進本

欽定四庫全書

子部

儒家類存目二

三

明惲曰初編曰初號遜菴武進人劉宗周之門人也宗周生平著述曰劉子全書曰儀禮經傳曰古學經曰家語考次曰古易鈔義曰讀易圖說曰論語學案曰曾子章句曰十三字曰古小學集記曰古小學通記曰孔孟合璧曰五子聯珠曰聖學宗要曰明儒道統錄曰人譜曰人譜雜記曰中興金鑑錄曰保民要訓曰鄉學小相編其子洵彙而訂之凡百餘卷以篇帙繁富未易盡觀因倣近思錄例分類輯錄一道體二論學三致知四存養五克

治六家道七出處八治體九治法十居官處事十一教人之法十二警戒改過十三辨別異端十四總論聖賢每一類爲一卷其排纂頗爲不苟然亦有一時騁辨之詞不及詳檢而收之者如曰天命一日未絕則爲君臣一日旣絕則爲獨夫故武王以甲子日興若先一日癸亥便是篡後一日乙丑便是失時違天云云此語非爲臣子者所宜言且癸亥師在商郊矣實非甲子興師卽甲子滅紂先一日之說亦未免過於求快如斯之類其去取尙

未當也

宋先賢讀書法一卷

內府藏本

不著撰人名氏所採宋儒之說凡十二家而朱子為多其法始以熟經繼以玩味終以身體力行明萬歷丙午莆田訓導江震鯉序而重刊之亦不云誰所輯也

諸儒要語九卷

浙江巡撫探進本

明王化振編化振字宇春滁州人萬歷己酉舉人官至戶部主事周汝登之門人也是編節取諸儒

語錄編次而成於宋則周程張朱而外取陸九淵楊簡二人於明則取薛瑄羅汝芳及汝登三人而已其宗旨則不出於姚江一派蓋汝登本傳王氏學也

存古約言六卷

浙江巡撫探進本

明呂維祺撰維祺有四禮約言已著錄是書凡十篇首敦本次閑家次厚俗次冠昏喪祭次服式次宴會次交際次揖讓次柬割大略以朱子家禮為主竝採擇諸家之言為條例註釋而以箴誡格

言附於後亦司馬氏書儀呂氏鄉約之支流也

真儒一脈

無卷數 江蘇巡撫採進本

明吳桂森編桂森有周易像象述已著錄是編前列從祀四先生語錄薛瑄胡居仁陳獻章王守仁也後列東林三先生語錄顧憲成錢一本高攀龍也前有天啟丙寅桂森自序千頃堂書目載桂森著述二種江南通志載四種皆無是書殆偶然鈔錄當時未著於世耶

論語逸編三十一卷

浙江吳玉墀家藏本

明鍾韶編韶字牙臺海鹽人是編集諸書所載孔子問答之語分三十一篇前有其甥鄭心材序稱其根據六經節取百家然家語自有全書禮記列於經典重為割裂殊屬牀上之牀孔叢子既屬偽書韓詩外傳說苑新序亦多依託未可據為典要至於承螭弄丸乃莊子寓言而執為實事赤虹黃玉九識緯誕語而信為古書他若楊簡先聖大訓亦哀合諸書而成乃引為出典尤非根柢之學也

閑道錄十六卷

浙江巡撫採進本

明沈壽民撰壽民字眉生號耕巖宣城人崇禎中行保舉法巡撫張國維以壽民應詔甫入都即劾楊嗣昌奪情熊文燦撫賊畱中不報乃移疾歸疏中語侵阮大鍼福王時大鍼柄國必欲殺之變姓名遁迹以免事蹟附見明史田一儁傳是書為排斥佛老而作故名以閑道取先儒格言分條節錄凡不惑於二氏者咸載之以為世訓不能無惑者亦錄以示戒雍正戊申其孫廷璐校刊之復取壽民詩文雜記等條補諸卷末

印正彙六卷

江西巡撫探進本

明張信民撰信民澠池人孟化鯉之門人也傳姚江良知之學從游者頗眾其門人馮奮庸等錄其平日問答議論為是書

國朝雍正丙午澠池縣知縣王箴輿為校訂而刊之

衡門芹一卷

山西巡撫探進本

明辛全撰全字復元號天齋絳州人萬歷末貢生以特薦授知府未及赴官而卒全為曹于汴門人故亦喜講學是書皆論治天下之法分治本三綱

治具八目三綱曰君治君心君學八目曰選賢才以轉士習破資格以定臣品行限田以足民生定里甲以防姦宄驅游民以務生業正禮樂以興教化其宗藩軍政二目則有錄無書自序稱屏伏衡門芹曝之獻不能自已故名其書曰衡門芹然全意主匡救時弊而實勦襲舊文其限田之法於事理尤斷不可行亦祇儒生之迂論而已

經世碩畫三卷

山西巡撫探進本

明辛全撰此書輯前代事蹟議論之有關治道者

分爲二門一曰聖典採據皆紀明太祖至英宗五朝善政二曰定論採據皆宋明諸儒之說而以北魏至唐共四條附焉書爲其門人所刊故卷末併載全試策一首其論取士不過調停於科目保舉之間別無創見當事者遽稱其學術經濟俱於是見殆未必然

思聰錄一卷

湖北巡撫探進本

明賀時泰撰時泰字叔交一字陽亨陳鼎畱溪外傳作字叔文以時泰之名推之交字有義文字誤

也江夏人少為諸生以聾廢因自號曰聾人是書為其子大學士逢聖所編皆其講學語錄大旨示良知之說

作師編一卷 湖北巡撫探進本

明賀時泰編首列易蒙卦次列大學聖經一章次列禮記學記一篇次列白鹿洞規五節六十九字次列程董學則一節九十一字終以興文會條件兩頁有奇皆無一字之發明又屬天下所習見亦何必為此鈔胥也

人模樣一卷 湖北巡撫探進本

明賀時泰撰是編以人身五官四體之類分目標題往往牽強如元氣一條引唐柳公權語是攝養之法非學問之事兩肘一條引楊時兩肘不離案語腳一條引宋璟有腳陽春事皆關合字面而已其骨頭一條引陳獻章除却此心此理渾是一包膿血裏一塊骨頭語亦是論心非論骨也不及劉宗周人譜遠矣陳鼎畱溪外傳乃稱一時學者俱奉此書為法則因稱時泰為人模樣先生蓋講學

家標榜之談不足據也

傳習錄論述參一卷

安徽巡撫探進本

明王應昌編其子燏續成之應昌有宗譜纂要已著錄是編皆發明傳習錄之旨蓋姚江之學弊於明末至

國初而攻之者彌衆故應昌父子力爲之回護

云

留書別集二卷

江蘇巡撫探進本

明章世純撰世純有四書留書已著錄是編內集

一卷分四十三篇篇各有名多摹倣周秦諸子散集一卷皆內集之緒餘不立篇名故謂之散前有世純自序總謂之別集以有說四書者故也兩書自序甚明明史合爲一編殊非世純之意今分載之又此書內集散集各一卷合四書六卷僅得八卷而明史乃作十卷然四書六卷無所闕佚內集列有目錄無所散失散集亦首尾完具蓋是集初名已未畱亦編爲二卷周鍾序之張煒如以刊本未善因爲編定先後考正標題定爲此本雖有小

異實卽一書明史殆以兩本竝行故合之稱十卷
歟

已未畱二卷

浙江巡撫採進本

明章世純撰此本前有周鍾序其文與張煒如所編畱書別集相出入但次序小異又不標篇名煒如所謂坊刻質譌零失篇目者蓋卽此本也

性理綜要二十二卷

浙江巡撫採進本

舊本題明詹淮輯陳仁錫訂正而前有凡例一條云性理有詹柏山諸理齋黃葵陽李九我董思白

諸刻或病其太簡略茲刻從大全增益之云云柏山卽詹淮之號則凡例必非淮語殆仁錫取淮原本稍增輯之又卷首竝存李廷機詹淮及仁錫序皆稱其所自輯而仁錫序中亦不稱爲據淮本卽其開卷數頁已自相牴牾則是書爲庸俗坊本決矣書中各加標識於可作闡試題者從○可作小試題者從△可作策題者從△竝見之凡例序中大抵爲場屋剽竊之用於性理本旨實無所關也淮自署新安人仕履未詳仁錫有繫詞十篇書已

著錄

性理標題彙要二十二卷

江蘇巡撫採進本

舊本亦題明詹淮陳仁錫同編核檢其文與性理綜要相同蓋坊賈以原刻習見改新名以求速售

非兩書也

家誠要言一卷

編修程晉芳家藏本

明吳麟徵撰麟徵字來皇號磊齋海鹽人天啟壬戌進士官至太常寺少卿明亡殉難

世祖章皇帝賜諡貞肅事蹟具明史本傳是編皆麟徵居

官時寄訓子弟之書其子蕃昌摘錄其語輯為一

帙故曰要語蕃昌字仲木劉宗周之門人也

讀書劄記四卷

江蘇巡撫採進本

明喬可聘撰可聘字君徵一字聖任寶應人天啟

壬戌進士官至河南道監察御史是書自序謂始

讀王文成全書知有知行合一之學又與澗山葉

子幾亭陳子互相切劘知有居敬窮理之學晚年

讀性理大全近思錄諸儒語錄知有理一分殊之

學蓋可聘之學初從陸王入晚乃兼信程朱故其

說出入於兩派之間然生於明季頗染佻薄之習
如其中一條云中庸其至矣乎無極而太極又一
條云中庸首言天命之謂性終言上天之載無聲
無臭太極而無極此其詞氣與叢林方丈掉弄機
鋒何異乎

弟經一卷

直隸總督
採進本

明林允昌撰允昌有易史象解已著錄是書仿孝
經分十八章篇末引詩亦仿孝經之體大抵掇拾
陳言徒供覆瓿又偽忠經之重儻矣

經史耨義二十二卷

江蘇巡撫
採進本

明林允昌撰莆田有金石社乃林氏宗人講肄之
所允昌集子弟月三會於其中之栖綠堂每會講
五經及諸史自崇禎庚辰四月始為第一期至十
一月止凡二十二期而經史義俱講畢門人張拱
宸等因輯而成編允昌以請學為圃自題所居故
復引禮講學以耨之之語名之曰耨義

消閒錄十卷

浙江范懋柱家
天一閣藏本

明成勇編勇字仁有安樂人天啟乙丑進士官至

南京監察御史崇禎十一年以劾楊嗣昌逮治戍甯波衛福王時起爲原官不赴披緇而終事蹟具明史本傳是編乃其講學之語皆纂輯諸儒論說而發明以己意史稱勇初授饒州府推官謁鄒元標於吉水從之受業故多傳其緒論云

顏子繹五卷

浙江巡撫採進本

明張星撰星永城人崇禎甲戌進士官光祿寺署丞是編取論孟中所載顏子事實語言釐爲十則每標題下係以四言四句若釋家之偈每則之下

系以繹說頌語謂之內篇又取家語中所載釐爲八則謂之外篇取韓詩外傳所載十四則謂之繹餘均有繹無頌復取諸家之論顏子者四十則謂之統繹末以陶宗儀所輯顏子九篇附焉謂之舊本其大旨皆入於禪蓋自心齋坐忘之說倡於莊子皇侃論語義疏遂以屢空爲心虛無累焦竑因之顏子之學爲異端所假借久矣星當心學橫決之時又著爲此書言之加詳耳此所謂陽儒陰釋講學之極弊也於理當入釋家以所載皆顏子言

行姑附之儒家類而糾正其謬焉

性理會通七十卷續編四十二卷

江蘇巡撫探進本

明鍾人傑撰人傑字瑞先錢塘人是書成於崇禎

甲戌即性理大全而增以明人之說袁宏道陳繼

儒皆躋諸理學儒先之列則其去取可知矣

學脈正編五卷

浙江巡撫探進本

明李公柱編公柱初名松字子喬嘉善人崇禎庚

辰進士官歙縣知縣是書取薛瑄胡居仁顧憲成

錢一本高攀龍五人語錄彙輯成帙人各一卷末

各系以傳贊蓋欲標篤實之學以抗姚江之末派
然如曹端之學其醇正不減薛瑄何以又獨遺之
乎則亦意為進退而已矣

道學迴瀾八卷

江西巡撫探進本

明王尹撰尹字莘民號覺齋安福人嘗從鄒元標

高攀龍講學於首善書院會黨禍起乃歸里崇禎

末大學士陳演欲薦之辭不就蓋薄演之為人也

是編乃其門人所錄大旨力闢心學辨陽儒陰釋

之誤所取惟薛瑄胡居仁羅欽順霍韜四家而於

王守仁朱子晚年定論則反復掎擊雖鄒元標爲所信從而於其完養吾心到純熟處義理自然流出之說亦不少假借其持論甚正但文繁不殺意重語複衍至百六十二條未免冗蔓耳末附覺齋詩編一卷皆談理之作又附錄李長春所作尹傳其時尹尙無恙仍未免明末標榜之習矣

西疇日鈔二卷

江蘇巡撫採進本

明顧樞撰樞字庸菴無錫人天啟中舉人顧憲成之孫高攀龍之門人也此書主程朱而闢陸王又

謂考亭之學得姚江而明又謂文成之學從程子來惜矯枉過正遂啟後來之弊皆不甚確各條之下閒有其子貞觀識語蓋刊版時所附入也

求仁錄十卷

浙江巡撫採進本

明潘平格撰平格字用徵慈溪人是書共分七目曰學脈曰格致曰性理曰孝悌曰讀書曰學問曰篤志力行而其立說大綱總以吾性渾然天地萬物一體爲求仁之宰毛文強爲作小傳稱其少時念程朱王羅之學皆不合於孔孟因竭力參求漸

痛交迫者四十日始得親證孔孟之學然聖門大旨惟尊德性道問學二途平格一概棄置別闢門徑則所云證孔孟之學者亦仍流入禪宗而已文強乃謂其功不在孟子下何其偵歟

卓菴心書四卷

江西巡撫採進本

明張自勳撰自勳有綱目續麟已著錄其論學以求放心爲本謂陽明言良知是偶有所見故從此推出遂主張立說不若言正心尤爲探本窮源之論然自勳之學實沿陽明之餘波觀其自跋可見

故書中於象山白沙甘泉龍溪之說多所採掇也

疊菴雜述二卷

浙江巡撫採進本

明朱朝瑛撰朝瑛有讀易略記已著錄茲編則隨其所偶得雜書成帙每喜以數言理蓋其學本出黃道周也

孔子遺語一卷

浙江范懋柱家天一閣藏本

不著編輯者名氏皆哀集羣書所引孔子之言觀其孔子卜得賁一條自記云已見漆雕氏第與此少異孔子曰吾志在春秋一條自記云已刻再查

魯哀公使人穿井一條自記云已見集語卷五蓋
欲補宋薛據孔子集語之遺而尚未成書中引楊慎
升鈔錄則近代人也

欽定四庫全書總目卷九十六

番禺張錫麟初校
番禺高學耀覆校

五二